

舊小說

丙集 五代

于闐記

高居誨

自靈州過黃河。行三十里。始涉沙。入党項界。曰細腰沙。神樹沙。至三公沙。宿月支都督帳。自此沙行四百餘里。至黑堡沙。沙尤廣。遂登沙嶺。沙嶺。党項牙也。其酋曰捺崖天子。渡曰亭河。至涼州。涼州西行五百里。至甘州。甘州。回鶻牙也。其南山百餘里。漢小月支之故地也。有別族。號鹿角山沙陀。云朱邪氏之遺族也。自甘州西始涉磧。磧無水。載水以行。甘州人教晉使者作馬蹄木。澀四竅。馬蹄亦作四竅。而綴之。駝蹄則包以犂皮。乃可行。西北五百里。至肅州。渡金河。西百里。出天門關。又西百里。出玉門關。經吐蕃。男子冠中國帽。婦人髻髮戴瑟瑟。云珠之好者。一珠易一良馬。西至瓜州。沙州。二州多中國人。聞晉使者來。其刺史曹元深等郊迎。問使者天子起居。瓜州南十里。鳴沙山。云冬夏殷殷有聲如雷。云禹貢流沙也。又東南十里。三危山。云三苗之所竄也。其西渡

都鄉河曰陽關。沙州西曰仲雲族。其牙帳居胡盧磧。漢明帝時。征匈奴。屯田於吾盧。蓋其地也。地無水而常寒。多雪。每天暖雪消。乃得水。匡鄴等西行入仲雲界。至大屯城。仲雲遣宰相四人都督三十七人。候晉使者。匡鄴等以詔書慰諭之。皆東向拜。自仲雲界西。始涉磧。磧無水。掘地得溼沙。置之胸。以止渴。又復渡陷河。伐檉置水中。乃渡。不然則陷。又西至紺州。紺州。于闐所置也。在沙州西南。云去京師九千五百里矣。又行二日。至安軍州。遂至于闐。聖天衣冠如中國。其殿皆東向。曰金册殿。有樓曰七鳳樓。以葡萄為酒。又有紫酒青酒。不知其所釀。而味尤美。其食。粳沃以蜜。粟沃以酪。其衣布帛。有園圃。花木俗喜鬼神。而好佛。聖天居處。嘗以紫衣僧五十人。列侍。其年號同慶二十九年。其國東南曰銀州。盧州。涇州。其南千三百里。曰玉州。云漢張騫所窮河源出于闐。而山多玉者。此也。

陷北記

胡嶠

自幽州西北入居庸關。明日又西北入石門關。關路崖峽。一夫可以當百。此中國控扼契丹之險也。又三日。至